

COMUNICATO n. 217 del 31/01/2026

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 31 de jené vegn fora la puntata #523 del program ladin per la television

[Ladino] Ence chesta setemèna l é a la leta l nef appuntament de “Pedies”, rotocalch ladin de informazion, ruà a la puntata n. 523. I argomenc che vegn portà dant te la puntata de chesta setemèna l é:

La focola olimpica la é ruèda ence te Fascia. En mercol ai 28 de jené la fiamma la é pontèda via dadoman a Ortijej per ruèr tel raion de schi de Fascia anter Rodela e Belvedere. Da chiò la é stata portèda a Cianacei, Ciampedel Soraga e Moena per do passèr forin Fiem. Anter i tedofors sion jic a domanèr fora imprescions e sensazions a Dino Davarda de la Scola de schi de Cianacei e ai olimpioniches Chiara Costazza e Martino Soracreppa.

Ai 27 de jené l é stat l Dì de la Memoria: la scoles autes de Fascia les à endrezà vèlch moment de recordanza. Studenc e dozenc i à endrezà ativitèdes de recordanza ativa, i se à metù dant domanes sul significat de la memoria e si valor per la generazions jones. L é stat rejonà de che che vel dir recordèr chi fac e avenimenc del passà, del significat de la memoria aldidanché de coche vegn metù ensema l’identità aldò de la memoria. Recordèr per vardèr inant a n davegnir mior, n empegn envers la comunanza, lurèr duc dessema per esser miores.

L’edizion nr 53 de la Marcialonga: na edizion che chest an, pervia de la neif, la é stata ria e sfadiosa e l’à vedù n muie de jent che se à retirà. Ence instouta i scric ite i era de passa 6mile e desche zenza n muie i vegnia da la Scandinavia. Prumes l é ruà 2 norvegeis Kasper Stadaas e Emilie Fleten che i ge à metù 3 ore e mesa, 50 menuc de più che l an passà pervia de la neif. I dis dant l é stat metù a jir ence etres evenc sportives desche la Marcialonga Baby, la Mini, la Young, la Stars e la Story, che chest an, pervia de la olimpiades i é vegnui tramudé te Fascia. Segur chesta edizion la passerà a la storia per tant ria che la é stata ma tel medemo temp la machina organisativa, con si 1500 volontères, l’à confermà duta sia capacità per meter a jir chest event de nonzech. Col 2026 i Studafech de Fascia i à n ispetor de distret nef: più avisa Giancarlo Pederiva da Poza. A la dir dita no se pel dir che l fossa deldut nef ajache l aeae jà corì chesta encèria per 7 egn alalongia dal 2013 al 2020 canche l é stat chiamà a cef de la federazion di Studafech de la provinzia. Giancarlo l tol l post de Alessandro Pellegrin che l à fat a saer de no esser più a la leta per jir inant. Giancarlo l ne à contà che so mandat l arà l fin de riportèr endò na bona armonia te anter i gropes di studafech de la val e ence de enjignèr jent jona e neva acioché l distret l posse aer persone che porta inant chesta encèria per i egn che vegn.

I reports de chesta setemèna i é stac enjigné e porté dant da Angela Pederiva e Riccardo Zanon.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)